



Ruta humanitarne ekspedicije "The Tour 2 Vareš 2009"

Globalni pravac kretanja ekspedicije je sjeverozapad - jugoistok, smjer jugoistok, s neznatnim promjenama pravca kretanja na pojedinim etapama zbog specifične konfiguracije terena.

Zbog zabrane kretanja biciklista autocestama, cijelo vrijeme ćemo koristiti lokalne, paralelne i alternativne puteve, kao i biciklističke staze na dionicama gdje ih ima.

1. Ruta kroz Nizozemsku i Belgiju

Ekipa starta iz gradića Goirle na samom jugu Nizozemske, mjestu stanovanja naseg vozača Damira Josipovića, satelitskog mjestašceta pored grada Tilburga. 15. maja ujutru krećemo prema njemačkom gradu Aachen-u (Aken) i na toj prvoj, jako zahtjevnoj etapi od oko 130 km, napuštamo teritoriju Nizozemske 20 km južno od grada Eindhoven-a i 3 km sjeverno od belgijskog grada Neerpelt-a gdje ulazimo na državnu teritoriju Belgije, koju napuštamo nekoliko sati kasnije, 4 km sjeverno od belgijskog grada Maasmechelen-a. Potom ponovo ulazimo na teritoriju Nizozemske i njome vozimo nekoliko sati do pograničnog mjesta Vaals gdje ćemo prenoćiti.

2. Ruta kroz Njemačku

Narednog dana, 16.05. ulazimo u Njemačku, čija će nam teritorija po procjenama oduzeti oko 65% od ukupnog vremena, i slijedimo pravac prema njemačkom gradiću Kall, te nastavljamo jugoistočno prema seocetu Kaisersesch u čijoj ćemo okolini noćiti.

Iz današnje perspektive ne možemo sa preciznošću dalje tvrditi kada i gdje će biti sljedeće odmorište, jer će to ponajviše odrediti vremenske prilike. Trudit ćemo se da vas o tome pravovremeno informiramo na ***web stranicama ekspedicije***.

Put nastavljamo dalje prema Bad Kreuznach, potom prolazimo nekoliko km južno od gradića Alzey na putu ka Ludwigshafen-u ispod kojeg prelazimo rijeku Rajnu, na samom južnom obodu grada Mannheim-a. Put nas dalje vodi preko Eppenheim-a, južno od Heidelberg-a u pravcu Schwaidern-a i Lauffen-a. Nakon toga prolazimo sa sjeverne strane mjesta Schor i Dorf i na putu prema gradu Langenau prolazimo sjeverno od Goppingen-a i Geislingen-a. Jugoistočno od Langenau kod mjesta Leipheim prelazimo rijeku Dunav. Dalje nastavljamo put prema Landsberg-u i desetak kilometara južno od jezera Ammersee prolazimo ispod München-a. Potom slijedimo pravac Weilheim-a i nastavljamo dalje prema jugoistoku, prema Alpskom masivu i Austriji, najtežoj dionici puta...

3. Ruta kroz Austriju

Na području Istočnog Tirola ulazimo u Austriju i vozimo prema gradu Lienz-u (da vas ne zbuni, nije onaj Lienz ispod Passau-a i iznad Graz-a kojeg poznajemo s našeg puta kada vozimo u rodni kraj). Od njega nas put kroz vrleti Tirola vodi prema gradiću Hermagor (južno od Spittal-a) odakle nastavljamo preko Arnoldstein-a prema Slovenskoj granici. Procjena je da ćemo oko dvije trećine puta kroz masiv Alpa, zbog teške konfiguracije terena, morati preći u BL. To je naznačeno i u uvodnoj riječi na našoj stranici.

4. Ruta kroz Sloveniju

Namjera nam je ući u Sloveniju na granični prelaz Podkoren, međutim u zavisnosti od vremenskih prilika na Karavankama, alternativni ulaz na državnu teritoriju Slovenije su prelaz Korensko sedlo ili eventualno Jesenice. Dalje vozimo preko Bleda prema Kranju i Ljubljani, koju ćemo obići sa sjeverne strane. Put nastavljamo iznad Grosuplja preko Suhe Krajine prema Dolenjskim Toplicama i Beloj Krajini i kod Matlike napuštamo Sloveniju.

5. Ruta kroz Hrvatsku

Od Metlike nas put kroz Hrvatsku vodi prema Karlovcu i Vojnicu pa onda zahtjevna etapa preko Petrove Gore prema Topuskom i Donjem Žirovcu. Kod Dvora na Uni napustamo državnu teritoriju Republike Hrvatske i u Bosanskom Novom ulazimo u Bosnu i Hercegovinu.

6. Ruta kroz Bosnu i Hercegovinu

Od Bosanskog Novog preko Prijedora vozimo prema Banja Luci pa potom južno prema Jajcu. Nastavljamo put dolinom rijeke Lašve preko Turbeta prema Travniku i Vitezu pa potom uz Bosnu preko Visokog i Podlugova i... Dalje znate...☺.

Koristimo priliku da se unaprijed i iskreno zahvalimo obitelji Pavlović, Sanji i Mariju - Moci, i naravno malom Kardelju, koji su nam, kad su čuli za naš pravac kretanja, širom otvorili vrata svog doma i "zaprijetili" da - ako prođemo kroz Vaals a ne konačimo kod njih, bit će svašta... Znači, sljedeći petak navečer, 15.05. smo poslije pređenih 130 km na biciklu, na zasluženom odmoru kod Pavlovića i, naravno, sve će biti zabilježeno okom kamere. Napunit će baterije i vozači i BL a bome i Đuka i Cana. Moca je rekao da zadnju dvojicu čeka 'ladna piva i votka a vozače vitaminski sokovi... Osim toga, obitelj Pavlović je ekipi obezbjedila SIM kartice njemačkog provajdera koje ćemo koristiti za vrijeme prolaska kroz teritorij te države, što će nam znatno umanjiti troškove komunikacija. I na ovome im od srca zahvaljujemo.

Ovom prilikom i jedna molba.

Dragi i poštovani naši, ako neko od vas živi u blizini opisane rute bilo bi od velike koristi članovima ekspedicije da im se izađe u susret na način kao sto to čini obitelj Pavlović.

U očekivanju vaših reakcija unaprijed se zahvaljujemo i sve srdačno pozdravljamo,

Ekipa "The Tour 2 Vareš 2009"